

ԳՐԻԳՈՐ ՏԱԹԵՎԱՑԻՆ
ԵՎ ՄԵԾՈՓԱՎԱՆՔԻ ԴՊՐՈՑԻ ՀԻՄՆԱԴՐՈՒՄԸ

Ա. Ս. ՄԱԹԵՎՈՍՅԱՆ

Մեծոփա նշանավոր վանքը խոշոր դեր է կատարել հայ մշակույթի պատմության մեջ, մանավանդ XV դարի առաջին կեսում, Թովմա Մեծոփեցու ռաբունապետության շրջանում: Վանքը գտնվում է Քաջբերունյաց գավառի հյուսիսային կողմում, Ծաղկոտն լեռների հարավային փեշերին, երկու կիրճերի միացման տեղում: Նրանից հարավ ձգվում է ոչ բարձր լեռների մի շարք, որը վանքը բաժանում է Արճեշի դաշտից: Ս. Աստվածածնի վանքի Մեծոփա մականունը բանասերներն ու տեղագիրները կապում են վանքի վերևում վաղեմի ժամանակներից կառուցված ջրամբարի՝ «ոփի» հետ, որ նշանակում է «փոս», և քանի որ փոսը մեծ է, կոչվել է «մեծ ոփ»: «Մեծոփ կոչեցաւ, զի վերոյ մենաստանին ոփ մեծ՝ որ է փոս նախնեաց պարսպապատ շինեալ վասն ջուրց հավաքման»¹: Ըստ Խ. Լևոնյանի վանքը գտնվում է «խորունկ և լայնկեկ փոսի մը կենտրոնում», որից էլ Մեծոփ անունը²: Քաջբերունյաց առաջնորդ տեր Աբրահամը 1291 թ. Հարություն գյուղի եկեղեցում թողած արձանագրության մեջ, ուրիշ այլ գյուղերի և կալվածքների շարքում, հիշում է նաև «զգեղն Մեծոփ»³, որ վերադարձվել է Ասպիսնկա Ս. Աստվածածնի վանքին, որպես «սեփական աւանդսն, որ կարգեալ էլ յառաջնոցն, նախքան զաւէրն ի Խորասմէն»⁴: Այդ ժամանակներին են վերագրում նաև Ս. Աստվածածին վանքի կառուցումը: Ղ. Փիրղալեմյանը Մեծոփա վանքի հիմնադիր է համարում Աստվածատուր վարդապետ Արճիշեցուն. «Թվին ՈԾ (1201) Մեռելյարոյց Աստուածատուր վարդապետն Արճիշեցի շինէ սուրբ Աստուածածին եկեղեցին... Մեծոփայ և ապա վախճանեալ թաղի ի նոյն մենաստանն»⁵: Այս տեղեկությունը քաղված է Աստվածատուր վարդապետի վարքից⁶, որից, սակայն, երևում է, որ նա ոչ թե շինել, այլ վերաշինել է վանքը, որ այն կար 1201 թ. առաջ: Ահա այդ հատվածը. «Այս երջանիկ և երևելի վարդապետս Աստուածատուր էր ի գաւա-

1 Ն. Ս ա ր գ ի ս յ ա ն, Տեղագրութիւնք ի Փոքր և ի Մեծ Հայս, Վենետիկ, 1864, էջ 268:

2 «Քյուզանգիոն», Կ. Պոլիս, 1900, № 1196:

3 Ն. Ս ա ր գ ի ս յ ա ն, Նշվ. աշխ., էջ 268: Հետագայում, մինչև 1895 թ., Քրթագյուղը մի քանի այլ գյուղերի հետ հարկատու է դառնում Մեծոփա վանքին:

4 Նույն տեղում, էջ 268: Խոսքը Խորեզմշահ Ջալալեղդինի 1225—1230 թթ. Հայաստանում կատարած ավերածությունների մասին է: Հատկապես 1228—1230 թթ. Ջալալեղդինի ու Իկոնիայի սուլթանի և այլոց զորքերի ռազմաբեմն էր Խլաթի շրջանը (տե՛ս Հ. Մ ա ն ա ն դ յ ա ն, Քննական տեսություն հայ ժողովրդի պատմության, հատ. Գ, Երևան, 1952, էջ 192):

5 Գ. քհ. Ա դ ա ն յ ա ն, Դիվան հայոց պատմութեան, գիրք Ժ, Թիֆլիս, 1912, սյուն 492—493:

6 Մաշտոցի անվ. Մատենադարան, ձեռ. № 4517, Յայսմաւորք, էջ 370ա—371բ. «Մեհեկի Ի և փետրուարի ԺԱ, Յայսմ աւուր յիշատակ է աստուածաբան վարդապետին եկեղեցոյ Աստուածատուր Մեծոփայ վանից սուրբ ուխտին Քաջբերունոյ: Հայսմաւորքներից բացի տե՛ս նաև № 1669 ձեռագիր ժողովածուի էջ 35բ—42ա:

ռէն Քաջրերունեաց յաստուածապահ և յանեղաշէն քաղաքէն Արճիշոյ, որդի
 Կոլով մեծատան Աղբերիկ կոչեցեալ, որ և ետուն ղորդիս իւրեանց յուսումն
 սրբութեան աստուածաշունչ դրոցն գիտութեան, ի ճգնաւոր և ի պահացող ոմն
 կրանաւոր ազգական իւրեանց ի սուրբ ուխտն Աստուածածին: Եւ սնոյց ղնա
 ամենայն առաքինութեամբ և մաքուր վարուք կալ ի մարմնի իբրև զհրեշտակ
 աստուծոյ, որ և արժանի եղև քահանայական շնորհի: Վերը հիշված Աստվա-
 ծածին ուխտը Մեծոփա վանքն է, ուր Աստվածատուրը ստանում է իր նախնա-
 կան կրթութիւնը և արժանանում քահանայութեան աստիճանի: Այնուհետև
 Աստվածատուրը «հասեալ ի չափ հասակի կատարմանն Քրիստոսի, վարժեցաւ
 ի հրահանգս կրթութեան իմաստասիրութեան, ուսման աւետարանին քարո-
 զութեան, ընկալաւ վարդապետական իշխանութիւն ի վարժապետաց այնմ ժա-
 մանակին ի շնորհաց հոգոյն: Եւ ի մեռանել ծնողացն յերթեալ յԱրճէշ քաղա-
 քի, առեալ զստացուածս ծնողաց իւրոց, բաժանեալ ցրուեցաւ և ետ ողորմու-
 թիւն աղքատաց և տնանկաց: Զի ունէին կուղպակ բազումս, և զաւելորդն
 առեալ շինեաց զսուրբ զեկեղեցի Աստուածածնի կուսին, յամի ԶԾԾ (1201)
 թուականութեան մերս տումարի»⁷:

Ինչպես երևում է վերոբերյալից, Աստվածատուր քահանան երեսուն
 երեք տարեկան հասակում ձեռնամուխ է լինում վարդապետական կրթութեան
 և հավանաբար 7—8 տարի անց «ի վարժապետաց այնմ ժամանակի» վարդա-
 պետական գավազան է ստանում: Ծնողների մահից հետո կառուցում (վերա-
 կառուցում) է Մեծոփա Ս. Աստվածածնի եկեղեցին: Այս նշանակում է, որ
 վանքը գոյութիւն ուներ դեռևս XII դարի կեսերին, որի միաբաններից էր
 Աստվածատուրի առաջին ուսուցիչը:

Աստվածատուրը Մեծոփա ուխտը հանձնում է Թովմա ճգնավորին: Նրա
 «իմաստուն և գիտնական» մակդիրները ցույց են տալիս, որ այստեղ ուսում-
 նական կյանք կար: Այն ծաղկում է XIII դարի վերջին և XIV դարի սկզբին,
 նշանավոր մատենագիր և ուսուցիչ Մխիթար Սասնեցու, իր ուսումնակից
 Հովհաննես Ոսպնակեր Արճիշեցու և նրանց աշակերտների օրոք: Դարը փա-
 կում է Հովհաննես Մեծոփեցին՝ իր դպրոցով և նա էլ սկսում է հաջորդ դարը
 Մեծոփա վանքի վերաշինութեամբ: Վանքի արևմտյան որմին փորագրված
 արձանագրութիւնից իմանում ենք, որ «թուին ՊԾԸ (1409) ես Յովհաննէս
 վարդապետս, վերջինս եկեղեցւոյ և առաջնորդ աստուածաբնակ սուրբ ուխտիս
 Մեծոփայ, միաբանութեամբ ամենայն եղբարցս ապաստան եղեալ ի նոյն, որ
 զորացոյց զտկարս, ձեռն ի գործ արկեալ շինեցաք զսուրբ տաճարս Մարիա-
 մայ Աստուածածնին, յիշատակ հոգւոյ իմոյ մեղապարտի և ծնողացս կրկնա-
 կի, և որք մասն ինչ տրոց նուիրեալ են ի սուրբ եկեղեցիս: Արդ երես անկեալ
 պաղատիմ մանկանցդ սուրբ Սիովնի՝ որք ընծայէք զսուրբ հացն կենաց յիշես-
 չիք զմեզ առաջի անմահ գառին Յիսուսի Քրիստոսի, զի և ձեզ յիշողացդ, և
 մեզ յուսացողացս, և համօրէն միաբանիցս առհասարակ աշխատաւորացս
 ողորմեսցի Քրիստոս աստուած, ի կաթողիկոսութեան տէր Յակոբի, ի վար-
 դապետութեան քաջ հոգեւորին Գրիգորի Տաթևացոյն, յորմէ ազատեցաք ի
 կապանաց և անիծիցն Աղթամարայ: Ի բռնակալութեան Լանկ Թամուրին հիմ-

⁷ Նույն տեղում, էջ 570ա, 570բ: Հմմտ. Կ ի ր ա կ ո ս Գ ա ն ձ ա կ ե ց ի, Պատմութիւն Հա-
 յոց, Երևան, 1961, էջ 183—184:

նարեկեցաւ և ի պարոնութեան (Ղարա Ուսուֆին)⁸ աւարտեցաւ ձեռամբ ուստայ Ֆարաճին, Ատումին, Սիրունին, Դաթին, Տիրատրուն, Մկրտչին, Յովհաննէսին, Յովսէփին, Ղազարին, Ատումին, Մարտիրոսին, Ջաքարբէկին, Կիրակոսին և այլ ամենայն աշակերտաց նոցին»⁹:

Եկեղեցու կամարների մեջ, Հովհաննես Մեծոփեցու խորհրդով, վարպետները գաղտնի դարաններ էին կառուցել, որոնց մեջ պահվում էին ձեռագրեր¹⁰:

Այս վերակառուցումից հետո սկսվում է Մեծոփա վանքի մշակութային գործունեության ամենաբեղմնավոր շրջանը: Այդ ժամանակներից այնտեղ էր նստում նաև Քաջբերունիքի կամ Արճեշ գավառի առաջնորդ եպիսկոպոսը, որը միևնույն ժամանակ Մեծոփա վանքի վանահայրն էր¹¹:

Վերաշինված վանքի նավակատիկը համընկնում է Գրիգոր Տաթևացու Մեծոփա վանք դալուն: «Եւ ի հալածմանէ անօրինաց շարժեցաւ ի գաւառէն Սինեաց առեալ զմեզ՝ եկն ի գաւառն Արճիշոյ: Եւ արարեալ իւր բնակութիւն զաստուածահաճոյ ուխտն Մեծոփայ առ... վարդապետն Յովհաննէս և յոյժ ուրախացաւ, վասն զի ի նոյն ամին ՊԾԸ (1409) աւարտեալ էր զնորաշէն տաճարն սուրբ Աստուածածնին»¹², — գրում է Թովմա Մեծոփեցին իր Պատմութեան մեջ: Սարգիս Մեծոփեցին, Քաջբերունիքից Տաթև ուսանելու գնացած տասներկու աշակերտներից կրտսերագույնը, այլ կերպ է մեկնում Տաթևացու Քաջբերունիք գալը. «Եւ յազգմանէ հոգւոյն սրբոյ վասն իւրիք ինչ պատճառի եկն մեծ վարդապետն և երկրորդ լուսավորիչն յերկիրս Քաջբերունի, ի սուրբ վանս Մեծոփայ»¹³: Այն ժամանակ այդպես էր գրում նաև Թովմա Մեծոփեցին. «Շարժեալ ի հոգոյն ազգմանէ, եկեալ բնակեցաւ յերկիրս Քաջբերունոյ, ի սուրբ ուխտս Մեծոփայ»¹⁴: Ուրեմն Տաթևացու Քաջբերունիք գալու պատճառը միայն «ի հալածմանէ անօրինաց» մեջ չպետք է փնտրել, ոչ էլ համաձայնել Օրմանյանի կարծիքին, ըստ որի Թովմա Մեծոփեցին «իրեն գրավեց եռամեծ Տաթևացին ու զայն Վասպուրական բերավ»¹⁵, այլ նաև, ինչպես հենց ինքը

⁸ Ըստ Թովմա Մեծոփեցու, վանքի վերակառուցումը նույնպես սկսվել է 1402 թ. և ավարտվել Ղարա-Յուսուֆի իշխանության ժամանակ, հետևաբար «ի պարոնութեան» բառից հետո պետք է գրվեր Ղարա-Յուսուֆի անունը, ուր և գրել է հրատարակիչը:

⁹ Ղ. Փ ի Ր զ ա լ ե մ յ ա ՚: Նօտարք հայոց, Կ. Պոլիս, էջ 30:

¹⁰ Ն. Ս ա Ր զ ի ս յ ա ն, Նշվ. աշխ., էջ 267: Հեղինակը ցավով նշում է, որ զրազրերը թալանվել են քրդերի կողմից և մնացել են միայն մի ճառընտիր և մի Սարգիս գիրք:

¹¹ XV դարից հետո վանքը հաճախակի ենթարկվում է ավարի և ավերի. բայց միաբանները ջանում են հավատարիմ մնալ Մեծոփա վանքի լավագույն ավանդներին և ջարուհակում էին ձեռագրեր ընդօրինակել, նորոգել, պահպանել վանքի մատենադարանում ունեցածը և հարստացնել այն: Այդպես շարունակվում է մինչև XX դարի սկիզբը, մեծ եղեռնի տարին: Մինչև այդ, 1895 թ. թալանի է ենթարկվում վանքը: Միաբանները տեսնելով, որ այլևս ապահովություն չկա երկրում, Հովհաննես Ոսպնակերին վերագրվող «Մեռելայարոյց հրաշակերտ աւետարանը» տեղափոխում են լիմ կղզի, իսկ «վանքի մնացած 100 կտորե ավելի զրազրերը 1915 թվականի ապրիլին Քաջբերունյաց գավառի կոտորածին մնաց քյուրտերու ձեռքը և այդ ձեռով ալ կորստյան մատնվեցան», հոգևորականներից շատերը «կոտորածներու ընթացքին շարաշար տանջանքներով սպանվեցան», — գրում է ականատես վարդապետ Հյուսյանը (տե՛ս Մատենադարան, Անտիպ ձեռագրացուցակներ, № 92, էջ 19):

¹² Թ ո Վ մ ա Մ ե ծ ո փ ե ց ի, Պատմութիւն, Փարիզ, 1860, էջ 51—52:

¹³ Մատենադարան, ձեռ. № 921, էջ 367բ:

¹⁴ Լ. Խ ա շ ի կ յ ա ն, ԺԵ դարի հայերեն ձեռագրերի հիշատակարաններ, մասն Ա, Երևան, էջ 55, 101 (այսուհետև՝ Հիշատակարաններ):

¹⁵ Մ. Օ Ր մ ա ն յ ա ն, Ազգապատում, Կ. Պոլիս, 1912, էջ 2134:

Գրիգոր Տաթևացին է դրում. «յազդամանէ հողւոյն եկաք ի կողմանս Վասպուրական ծովու»¹⁶: Որո՞նք են այդ պատճառները: Սկսենք մի փոքր հեռվից: XIV դարի առաջին կեսին դադարել էր Գլաձորի համալսարանի և նվազել նրա հաջորդ Հերմոնի դպրոցի գործունեությունը, Հովհաննես Որոտնեցու Տաթևի դպրոցը մնացել էր միայնակ՝ կաթողիկ եկեղեցու գործակալների ու միարարական շարժման կողմնակիցների աշխուժացման պայմաններում: Մաղաքիա Ղրիմեցին միարարների դեմ պայքարելու համար, օգտագործելով իր մեծատուն հոր ունեցվածքը, Սյունիքում «շինեաց Բ վանս և կարգեաց Բ դպրատունս... որոց առաջնորդ էր... մեծ հոգևորն և բանիբուն իմաստունն վարդապետաց վարդապետն Կախիկ... նաև մեծ ռաբունապետն Սարգիս... Զայս Բ վարդապետքս կարգեաց Մաղաքիայն յ տեղիս, առ ի յընթեռնում և յուսուցանել: Եւ ինքն կայր սոցա ի ծառայութիւն և ի պատրաստիլ զպիտոյս կարեաց: Եւ այսպիսի վարուք կացեալ ամս ԺԵ (15) և ի թուականն մերում ՊԼԳ (1384) ամին դեղակուր եղև ի սանամօրէ իւրմէ՝ բանիւ երկաբնակ աղթարմա առաջնորդացն»¹⁷: Նշանակում է Մաղաքիա Ղրիմեցին Ապրակունիսի դպրոցը հիմնադրել է 1369 թ., իսկ Աստապատինը՝ նրանից հետո: Այս դպրոցներում բաղմաթիվ աշակերտներ էին ուսուցանում, վարդապետներ պատրաստում և պայքարում միարարների դեմ: Պայքարը զլիսավորում էր Հովհաննես Որոտնեցին, իսկ նյութական կողմն ապահովում էր Մաղաքիա Ղրիմեցին: 1384 թ. թունավորվում է Մաղաքիան: Թշնամուց հալածված, երկու տարի աշակերտներով լիռներում թափառելուց հետո, Որոտնեցին ապաստանում է Երնջակի Ապրակունյաց վանքում և այնտեղ 1386 թ. կնքում իր մահկանացուն: Նրան փոխարինում է Գրիգոր Տաթևացին: Սկսվում են Լենկ-Թեմուրի ավերիչ արշավանքները: Սարգիս վարդապետը, որ այս թվականներին Աստապատում էր, ավելի ապահով տեղ և օժանդակություն գտնելու համար գնում է Խոյ, ապա Քաջբերունիք և հաստատվում Խառաբաստա վանքում: Իսկ Գրիգոր Տաթևացին, նրանից որոշ ժամանակ անց, տեղափոխվում է Տաթև և շուրջ քսան տարի «ի դառնախաւար ժամանակիս, իբրև զարեգակ ի միջօրէի պայծառացեալ լուսաւորէ զեկեղեցի... լնու զկարօտութիւն բազմութեան եղբարցս... այլև զբոլոր ազգիս, միշտ գնալով ի մեջ այլազգեաց մեծամեծաց և փոքունց, զի ոչ գոյր իշխան և առաջնորդ, բաց ի սմանէ... շրջելով ի հինս և ի նորս, այլ և յարտաքին դիտութիւնս և ժողովելով զօգտակարն՝ կազմէ պսակս լուսաւորս ի զլուխս մանկանց եկեղեցոյ և վահան ամրութեան ընդդէմ այլադաւան տոհմի»¹⁸, — գրում է Թովմա Մեծոփեցին: Բայց արդեն քայքայվում էր Տաթևացու դպրոցը: Լենկ-Թեմուրի թոռ Աբուբաքրի և Կարա-Յուսուֆի պատերազմները արյունաքամ էին արել Վասպուրականը և Սյունիքը: Պատերազմական տառապանքներին ավելացել էր նաև բնական աղետը՝ Սյունիքի երկրաշարժը, երբ «ամ մի ի լման երկիրս շարժեալ... կարծր բնութիւնք վիմաց պատառեցան և բազում դիակունք մեռեալ գտան», Սյունիքի իշխան Սմբատի որդիք և եղբայրը՝ «պարոն Բուրթէլ՝ հանդերձ որդովք իւրովք՝ հանգեալ ի Քրիստոս»¹⁹: Մեծ դպրոց պահելը դժվարանում էր: Մինչև Քաջբերունիք գալը Տաթևացին արդեն պակասեցրել էր աշակերտների թիվը, և ուղարկել իրենց գավառները, «անտի քայքայեալ

¹⁶ Վենետիկ, ձեռ. № 1091, էջ 434:

¹⁷ Մատենադարան, ձեռ. № 4517, էջ 101ա:

¹⁸ Լ. Խ ա շ ի կ յ ա ն, Հիշատակարաններ, ԺԵ դ., Ա, էջ 74:

¹⁹ Նույն տեղում, էջ 80:

ցրուեցաք և եկեալ երկիրս Քաջբերունոյ... ի վանքս, որ կոչի հառաբաստա»²⁰, — գրում է Սարգիս Մեծոփեցին։ Ահա այդ ժամանակ միայն, իր աշակերտ Սարգսի և այլոց Քաջբերունիք գալուց որոշ ժամանակ անց, Տաթևացին, աշակերտների մի մասի հետ, գալիս է Մեծոփա վանք։

Մինչ այդ 1401 թ. արդեն մահացել էր հառաբաստի դպրոցի Սարգիս րաբունապետը։ 1406 թ. նրան փոխարինող Վարդան Հոգոցվանեցին աշակերտներով Քաջբերունիքից փախել էր Վանի Սալնապատի վանք և այնտեղ մահացել։ Նրան հաջորդող Գրիգոր հլաթեցի րաբունապետին չի հաջողվում Յիպնավանքում վերականգնել քայքայված դպրոցը։ Աշակերտներից տասներկուսը գնում են Տաթև, Գրիգոր Տաթևացու մոտ, իսկ Սարգիս վարդապետի դպրոցը, որ ստեղծվել էր Մաղաթիա Ղրիմեցու ջանքերով և հարատևել շուրջ քառասուն տարի, դադարում է գոյություն ունենալուց։ Տաթևի դպրոցը կորցնում է իր երկվորյակին, իսկ հայ ժողովուրդը՝ լենկթեմուրյան ավերիչ արշավանքներից հետո՝ իր դպրոցներից մեկը, որն այնքան անհրաժեշտ էր դավանափոխության դեմ պայքարելու և վարդապետներ ու գրիչներ պատրաստելու համար։ «Վասն մեղաց մերոց բարձան ճոխութիւնքն մեր և փառք, այսինքն առտուածունակ անձինքն... րաբունիք բարիք Սարգիս և Վարդան ամուլքն հաւատոյ, վասն որոյ եմք որպէս զմարմին մեկնեալ ի հոգւոյ, և տապիմք աներկեան նեղութեամբ թառանչ թախժանաւք, որպէս զագոաւ ունայն ի տանիս, և ոչ ուստէքէ մխիթարութիւն», — գրում է Հովհաննես վարդապետը Տաթևի իր ուսումնակիցներին²¹։

1408 թ. երկրորդ կեսին Գրիգոր Տաթևացին գալիս է «երկիրս Քաջբերունի, և ձմեռեալ ի հրեշտակաբնակ վանքս Մեծոփայ»²²։ Տաթևացու Քաջբերունիք գալու նպատակը հառաբաստավանքի քայքայված դպրոցի վերականգնումն էր։ Այդ բանը նրան հաջողվեց, բայց Մեծոփա նորաշեն վանքում, որտեղ իր դասախոսություններով հիմք դրեց Մեծոփա վանքի հայտնի դպրոցին, որը դարձավ Տաթևի և հառաբաստա դպրոցների ժառանգորդը։ «Եւ ժողովեցան առ նա բազումք ի վարդապետացն. Գրիգոր նահատակն և սուրբ այրն հլաթեցի, Յակոբ Ովսաննացի ի Ռշտունեաց, Մարգարէն ի Վարազայ, Յակոբ ի յԱսպիսնկա, Յովհաննէս ի Փափլինոյ, Ստեփաննոս ի Բերկրոյ, Մկրտիչն ի Հիդանայ, Յովհաննէսն ի Բաղիշոյ, Սարգիս վարդապետն ի Յարութենէն, Մելիքսէթն ի յՍրզնկա և ի քահանայից և աշակերտաց աւելի քան ութսուն աբեղայ եւ պայծառացեալ լուսաւորեաց աստուածային վարդապետութեամբ զամենեսին, իբրեւ փրկիչն մեր Յիսուս...»²³։ Իսկ Հովհաննես վարդապետ Մեծոփեցին բոլորի ուրախությունն արտահայտելով ասում էր. «Տէր Յիսուս, ես զՄայր քոյ պատուեցի, դու զիս՝ պատուեցեր վարդապետօք և հօգևոր հարբք իմօք և գրոց աշակերտօք և գրագրօք և ճգնաւորօք և ճշմարիտ ուսումնականօք և ի նաւակատիս տաճարի մօր քոյ առաքեցեր զնոսա»²⁴։ Նա «զամ մի լման մխիթարեաց զամենայն եղբարսն անճառելի ցնծութեամբ եւ զերիս գիրս մեկնեաց դասիւ...»²⁵։ Իսկ Գրիգոր Տաթևացին հաստատում է. «Եւ ընթերցմամբ հավաքե-

20 Նույն տեղում, էջ 93։

21 Վենետիկ, ձեռ. № 1091, էջ 417։

22 Լ. Խ ա շ ի կ յ ա ն, Հիշատակարաններ, ԺԵ դ., Ա, էջ 96։

23 Թ ո վ մ ա Մ ե ծ ո փ ե ց ի, Պատմութիւն, էջ 52, 59։

24 Նույն տեղում, էջ 59։

25 Նույն տեղում, էջ 52։

ցի զգժուարալոյծ բանս Յորայ և զՄեկնչաց նորա, և սակաւ ինչ լուծումն Առիստակիսի և Գէորգեայ ի խրատս գրչութեան, ընդ նմին և զքաղուածոյ մեկնութեան Յովհաննու աւետարանչի, և ընծայեցի ի պատիւ սուրբ տեղոյս ուսումնասէր անձանց՝ ուղղադաւան մտաց, և ի գլուխս բաժանելով վասն մտաւոր տեսութեան և ի զարդ ուսման, ի պէտս բեմբասացութեան և ի խրատս գրչատրութեան»²⁶:

Գրիգոր Տաթևացին «ուսումնասէր անձանց ուղղադաւան մտաց» համար վարդապետական ծրագիր էր տւել, մասնավորապէս շեշտելով գրչության արվեստի բնագավառը: Գրչության արվեստը բոլոր տիպի դպրոցների անկապտելի առարկան էր: Այն շատ լավ էին անցնում նաև Տաթևի դպրոցում: Բայց ահա այստեղ, Մեծփառ վանքի դպրոցում, գրչությանը ավելի շատ ուշադրություն պետք է դարձնեին, քան եղել է որևէ այլ դպրոցում: Պատճառն այն էր, որ լենկթեմուրյան արշավանքների ընթացքում ձեռագրական հսկայական կորուստներ էին եղել²⁷, հարկավոր էր, որ բազմացվեին մնացած երկերը և փրկվեին կորստից: Հովհաննես Որոտնեցու, Գրիգոր Տաթևացու և նրանց աշակերտների կողմից շատ նոր գործեր էին ստեղծվել ընդդեմ միարարների: Գ. Խլաթեցու խմբագրությամբ պատրաստ էին Յայսմաուրֆը և Գանձաւաւը: Բացի այդ, նախորդ երկու դարերում գրչության արվեստի ծաղկման հետ այդ բնագավառ էին թափանցել գրիչներ, որոնք չէին տիրապետում այդ արվեստի նրբություններին և աղավաղում էին ձեռագրերը: Ձեռագրական հսկայական ժառանգությունը ժամանակին ծառայեցնելու և ապագային օրինավոր կերպով փոխանցելու համար անհրաժեշտ էին գրագետ գրիչներ, և այդ խնդիրը լուծելու էր Մեծփառվանքի դպրոցը: Այս պատճառով էլ «զժուարալոյծ բանս Յորայ» մեկնելուց հետո Գրիգոր Տաթևացին «բացայայտեաց զգիրս գրչութեան Առիստակիսի և Մեծին Գէորգեայ»²⁸, — գրում է Թովմա Մեծփեցին, որոնցում շարադրված էին գրչության արվեստի քերականական-տեսական սկզբունքները:

Սակայն մի տարի անց Տաթևացին թողնում է Մեծփառ վանքը. «Եկեալ սիրելի աշակերտք նորա գողացան զնա ի գիշերի... եւ մեք ելեալ զնացաք զկնի նորա, հանդերձ վարդապետաւք և եպիսկոպոսաւք, և գրոց աշակերտաւք, և հասաք նմա յերկիրն Այրարատեան, լալով, ողբալով, արտասուաւք, աղիողորմ կսկծանօք և ոչ կարացաք դարձուցանել զնա: Եւ անդ (Երևանում — Ա. Մ.), մեզ ետ հրաման վարդապետութեան»²⁹ — շարունակում է Մեծփեցին:

1409 թ. Գրիգոր Տաթևացին Մեծփառ վանքից գնալուց հետո դպրոցի րաբունապետ է դառնում Գրիգոր Խլաթեցին, Գրիգոր Տաթևացու դասընկերը և

²⁶ Մատենադարան, ձեռ. № 1115, էջ 123բ:

²⁷ Ղ. Ալիշան, Հայապատում, Վենետիկ, 1901, Ա, էջ 11, 12:

²⁸ Լ. Խաչիկյան, Հիշատակարաններ, ԺԵ դ., Ա, էջ 101: Տե՛ս Լ. Գ. Խաչիկյան, Գրչության արվեստի լեզվա-քերականական տեսությունը միջնադարյան Հայաստանում, Երևան, 1962, էջ 221—321: Մատենադարան, ձեռ. № 1775, էջ 196ա, ձեռ. № 115, էջ 203բ:

²⁹ Լ. Խաչիկյան, Հիշատակարաններ, ԺԵ դ., Ա, էջ 101: Մինչ այս, մի անգամ էլ, Գրիգոր Տաթևացուն փետրվար ամսին են կամեցել տանել. «Ի մեհեկի ԺԵ (փետրվարի 21) զմեծ րաբունապետն ի սուրբ ուխտէ Մեծփառ կուտանէին ի Տաթև, և մեծ տրտմութիւն եհաս մեծի և փոքու, այլ ողորմութիւն աստուծոյ եհաս յօգնութիւն, Յոհանէս վարդապետն երբր զրերթաւազն և զքրիստոնեայ տանուտեարքն ամենայն և արգելեց, և եղև ուրախութիւն մեծ վարդապետաց և աշակերտացս ամենեցուն» — գրում է Մկրտիչ Մեծփեցին (Հիշատակարաններ, ԺԵ դ., Ա, էջ 94):

նշանավոր գրիչը, հառաբաստի դպրոցի վերջին ռաբունապետը, որը պետք է ապահովեր վարդապետական դպրոցի գրչության արվեստի հիմնավոր ուսուցումը: Այդ ժամանակ այդտեղ դասախոսելու է հրավիրվում նաև նշանավոր տոմարագետ Հակոբ Ղրիմեցին:

Իսկ «սքանչելի այրն Աստուծոյ Յովհաննէս վարդապետն մնաց և գաւառն Արարատեան»³⁰, իր հետի աշակերտներով, որոնց մեջ էր նաև Թ. Մեծոփեցին: Այդ առթիվ Գրիգոր Խլաթեցին մի նամակ է ուղարկում Արարատյան գավառ Թովմա Մեծոփեցուն: Նամակը օգնում է մեզ որոշ հարցեր լուսաբանել: «Նուսաստ Գրիգոր խնդրողս բանի... մատուցանեմ ողջոյն համբուրի... Եւ ընդ ողջունիս հարցումն աստուածախնամ կեանս, զորպէս և զիարդն, և տամք փառս տուաւդին փառաց, որ հասոյց զձեզ այդմ փառաց և աստիճանաց: Վասնորոյ հզոր ընդ մի գոհութիւն աստուծոյ և ձեզ երկար կենդանութիւն:

Այսուհետև առ իս դարձիր, ի տուն քո և առ եղբարս քո: Տես ի տաղնապ ճանապարհիս և խնայեա ի սոսա: Գիտես թէ որքան նեղացեալ է եղբայրդ քո Յովհաննէս էրէցդ ի ճանապարհիդ ի քո դիմացդ: Նոյնպէս և պարոն Յովհաննէս և Գորգի-Մելիքն և միաբան ամէն մեծէ ի փոքր:

Եւ թէ կու ջանաս զՅովհաննէս վարդապետդ ի հետ բերես, ապա թէ չէ ի գալ, դու եկ ի տուն քո, առ ընտանիս քո: Եւ թէ դորա սրտին աւֆայ կու պահէս, ուխշէպ կառնէս, դու առ մեզ արեկ, մեր աշացս լոյս ես և սրտի սուն: Ի Տէր Յուսկայն որդոյ վանացն մինչ ի Սքանչելագործն քո է: Ես էնց կու կամիմ աստուծով զքեզ առ իս, զինչ զլոյս աշացս, և զլուր ականջացս, զհոտ ըռնկացս և զճաշակ բերանոյս, զբարբառ լեղւոյս, և զշարժումն ձեռացս, զբայլս ոտիցս, և զառողջութիւն մարմնոյս, զմաքրութիւն հոգւոյս, և զսրբութիւն մտացս: Աստուած է վկայ ասացելոցս, որ էնց կարաւտ եմ քո սրբութեանդ, և կամիմ որ զմնացեալ աւուրքս ի քո շուքն անցուցանեմ, և զհողս հողոյն քո ձեռօքդ տաս:

Ողջ լեր աստուծով:

Թուղթս գնա յԱրարատեան գաւառն»³¹:

Այս անկեղծ նամակը ցույց է տալիս, որ Գրիգոր Խլաթեցին եղել է Մեծփառականից նորաբաց դպրոցի ռաբունապետ, որոշակի իրավունքներով և իշխանությամբ, այլապես չէր կաջող գրել «առ իս դարձիր» և ոչ էլ կարող էր ուրիշի իրավունքներն ու իշխանությունը, որոնք տարածվում էին Արծկեի Սքանչելագործ վանքից մինչև Արգելանի Տեր Հուսկան որդու վանքը, Թովմա Մեծփեցուն տալ: Ուրեմն իրավացի չէ Ա. Մովսիսյանը, երբ գրում է. «Մեծփեցին Տա-

30 Մատենադարան, ձեռ. № 2065, էջ 391ա: Սյունյաց եպիսկոպոս Առաքելը՝ Տաթևացու քրոջ որդին, աշակերտներով նրան Երևանից հոկտեմբերի 21-ին տանում է Տաթև. «եստ բաժանելոյն մեր ի նմանէ ԼՁ (36) օր», — գրում է Թ. Մեծփեցին, այսինքն դեկտեմբերի 27-ին, Տաթև-վացին վախճանվում է: Թ. Մեծփեցին մեծ բարեբախտություն էր համարում Գրիգոր Տաթևացու գոյությունը Շաղհիս Հայոց, զի զնա ունեաք հոգևոր և մարմնաւոր թագաւոր աստուածապարտ պարզէ, և զնա երարձ ի մեզանէ: Մինչ այդ, ինչպես գրում է Թ. Մեծփեցին, — Գրիգոր Տաթև-վացին, «մտանելով յերկիրն պարզեաց, այսինքն արձակեաց զմեզ ի բանագրութենէ անիծից սուտ և ապստամբ կաթողիկոսացն Աղթամարայ, և երեւ ազգիս Հայոց զփրկական համբաւն և առաջնորդեաց արժանաւորացն մտանել ի միաբանութիւն և ի հնազանդութիւն գերադրական և սուրբ աթոռոյն Գրիգորի Լուսաւորչին մերոյ» (Մատենադարան, ձեռ. № 2065, էջ 391ա. հմտ. Հիշատակարաններ, ԺԵ գ., Ա, էջ 105):

31 Վենետիկ, ձեռ. № 1091, էջ 397—398:

թևացու հրամանով նշանակվում է Մեծոփա դպրոցի վերատեսուչ և դասատու»³², հենվելով Տաթևացու արճիշտիցիներին գրած թղթի վրա, ուր Մեծոփեցու մասին ասված է. «եսու դմա հրաման և իշխանութին դաս ասել, աշակերտ կարգել»։ Այսպիսի հրաման տալիս էին վարդապետ ձեռնադրված աշակերտներից շատերին։ Իսկ հիշյալ թղթում բոլորովին ակնարկ չկա Թովմային Մեծոփա վանքի տեսուչ նշանակելու մասին։ Մեծոփա վանքում այդ ժամանակ, այսինքն 1410 թ. ընդօրինակված մի ժողովածուի գրիչ հիշում է «զհոգևոր հայրն մեր և ղծնաւղ զմեծ րաբունապետն Գրիգորիոս, որդի Մերին»³³, որը հլաթեցին է։

Թովմա Մեծոփեցին գրում է, թե Արարատյան գավառ գնալուց առաջ «մեծ վարդապետն Գրիգոր օրհնեաց զաշխարհս մեր»³⁴։ Այս նշանակում է, որ Տաթևացուն «զողանալը» այնքան էլ հապճեպ չի եղել, այնպես որ նա օրհնել է Քաջբերունիքը, և, հավանաբար, Գրիգոր հլաթեցուն ինքը կարգել րաբունապետ։ Այս բանից չէ՞ արդյոք, որ դժգոհել է Հովհաննես Մեծոփեցին։ Այլապես ինչու՞ն է նա Տաթևացու՝ Երևանից մեկնելուց հետո, մոտ վեց ամիս մնաց այնտեղ՝ կամ ի՞նչ են նշանակում հլաթեցու՝ Թովմա վարդապետին գրած նամակի հետևյալ տողերը. «Թէ կու ջանաս զՅովհաննէս վարդապետդ ի հետ բերես, ապա թէ չէ ի գալ, դու եկ ի տուն քո»։ Հովհաննես վարդապետը ետ չեկավ։ Նա զնաց Այրիվանք «եղկիր պագանել աստուածամուխ գեղարդեան... Ամենափրկչին... և անդ երկիր պագեալ հասեալ կենաց նորա»³⁵։ Մահը տեղի է ունենում 1410 թ. մայիս ամսին։ «Եւ մեք աշակերտք գոլով նմա և հոգևոր որդիք, Մկրտիչ, Թովմա և նահատակն մեծ վարդապետն Ռշտունեաց Յակոբ և վարդապետն Մկրտիչ թ Բերկրոյ, ժողովեցաք և բազում եղբարս, և եղաք զնա... ի մեծահանդէս ուխտն Հայոց թառ»³⁶։

1410 թ. ամռան սկզբներին Թովմա Մեծոփեցին վերադառնում է Քաջբերունիք և ստանձնում Մեծոփականքի դպրոցի րաբունապետությունը (որը նրան սիրով զիջում է Գրիգոր հլաթեցին) և այն տանում է Գրիգոր Տաթևացու նշած ծրագրով։ Այդ է պատճառը, որ Կիրակոսը, ամփոփելով իր ուսուցիչ Թովմա Մեծոփեցու տեսչական և ուսուցչական գործունեությունը, գրում է. «ԼԵ (35) ամ դաս ասելով ամենայն անձանց գրոց աշակերտելոց և բազում որդիս ի փառս ածեալ և է (7) աշակերտի գաւազան տուեալ... և ուսոյց ԻԴ (24) րնտիր գրագիր»³⁷։

Այս աշակերտները, ընտիր գրագիրները Վասպուրականի տարբեր կենտրոններում հետագայում ուսուցչություն մե գրչություն էին զբաղվում։ Թովմա Մեծոփեցին աշակերտներ էր պատրաստում, հայ դպրոցների համար դասագրքեր ու ձեռնարկներ ստեղծում, օգնում էր հարևան դպրոցներին՝ իր սաների ու ստեղծած ձեռնարկների միջոցով։ Նա ձեռագրեր էր հավաքում, նորոգում, խմբագրում, լրացնում, հանձնարարում ընդօրինակության, փրկում էր անհետ

32 Ա. Մ ո վ ս ի ս յ ա ն, Ուրվագծեր հայ դպրոցի և մանկավարժության պատմության, Երևան, 1958, էջ 205։

33 Մ. Ք ե շ ի շ յ ա ն, Ցուցակ Զմմառի, № 227, էջ 542։

34 Թ. Մ ե ծ ո փ ե ջ ի, Պատմութիւն, էջ 60։

35 Նույն տեղում, էջ 61։

36 Նույն տեղում, Մ. Օրմանյանը թյուրիմացաբար կարծում է, թե այս վերաբերում է Գրիգոր Տաթևացու թուղմանը (Աղգապատում, էջ 202ձ)։

37 «Պատմութիւն մեծ րաբունապետին Թումայի» (Գ. Հ ո վ ս ի ս յ ա ն, Թովմա Մեծոփեցու կենսը, Վաղարշապատ, 1914, էջ 8)։

կորստից: Զբաղվում էր նաև մատենագրությամբ, իր ապրած ժամանակի անցուղարձը նկարագրող «Պատմությունից» բացի, նրա գրչին են պատկանում շուրջ երեք տասնյակ գործեր³⁸:

Թովմա Մեծոփեցին, Գրիգոր Տաթևացու նման, որը հայոց ազգի համար դարձել էր, Թ. Մեծոփեցու իսկ արտահայտությամբ, «հոգևոր և մարմնավոր թագաւոր աստուածապարգե», ինքը ևս հոգում էր տառապյալ ժողովրդի մասին. «Զնեղութիւն և զտրտմութիւն տառապեալ ազգիս արամեան տանս արեթեան աշխատէր հանապազ ի թուղթ գրելն վասն աղքատաց և գերելոց, որ մին տարին Գ դաստա թուղթ վճարել էր ի նամակ գրելն», — գրում է նրա վարքագիյր Կիրակոս բանասերը:

Թովմա Մեծոփեցին, որպես հայ եկեղեցու և ժողովրդի սպասավոր, մի նամակում նախ օրհնում, ապա դիմում է ժողովրդին՝ ժողովրդի համար³⁹: Համազգային շարիքի պարագաներում հայ վարդապետը իր ուսերի վրա էր վերցրել նաև աշխարհիկ իշխանության որոշ իրավունքներ և առաջարկում էր ժողովրդի բոլոր խավերին՝ հոգևոր և աշխարհիկ, որ ոչ միայն իրենց ունեցածից սովորական ողորմություն և օգնություն տան աղքատներին և գերի ունեցող ընտանիքներին, այլև այդ նպատակների համար շինայել նույնիսկ եկեղեցուն նախատեսած բաժինը. ինչ «խաչի է խոստացեալ կամ Երուսաղէմայ ճանապարհին, կամ եկեղեցւոյ»:

Նրա անմիջական նախաձեռնությամբ ու ղեկավարությամբ իրագործվեց ամենայն հայոց կաթողիկոսության վերահաստատումը էջմիածնում 1441 թ., որը խոշոր համազգային նշանակություն ունեւր և որի համար մտահոգված էր իր ուսուցիչ Գրիգոր Տաթևացին:

Թովմա Մեծոփեցու բարունապետությամբ Մեծոփա դպրոցը եղավ Սարգիս վարդապետի և Գրիգոր Տաթևացու դպրոցների ավանդների շարունակողը:

38 Լ. Խաչիկյան, Թովմա Մեծոփեցու մատենագրական վաստակը (անտիպ):

39 Դ. Հովսեփյան, նշվ. աշխ., էջ 6: Ահա այդ նամակներից մեկը, որ բերում ենք կրճատումով, քաղված Թովմա Մեծոփեցու հավաքած նամակների ժողովածուից: «Նուաաստս դրիմ զյիսուսաւանդն ողջոյն և զհաւատացեալսդ սրբոյ երրորդութեանն, ուր և հասանի նամակս արհնութեան մերոյ, ի քաղաք, ի դեպղ, վանք և յանապատ:

Նախ՝ առաջին, աստուածարան վարդապետաց, առաքելաշնորհ եպիսկոպոսաց, սրբանուէր քահանայից, ուղղափառ սարկաւաղոց, քրիստոսասէր իշխանաց, հաւատարիմ տանուտէրաց, քաջամիտ ձեռնաւորաց, իմաստուն վաճառականաց, աշխատասէր հողագործաց, փարթամ և առատամիտ շինականաց, համեստ և ողորմած կանանցդ, մեծամեծաց և փոքունց, երիտասարդաց և կուսանաց, ծերոց և տղայոց, եւ առհասարակ ամենայն ժողովրդոց... աղաթիւք հայցէմք յամենառատ տէառնէ հեղցէ ի վերա ձեր յինչս յողի և ի մարմին ձեր, ի տունս և ի բնակութիւն ձեր, յինչս ձեր և ի ստացուածս ձեր, յանդ և ի վաստակս ձեր, յանասունս և ի հօտս ձեր, և զամենայն պատուհաս, որ վասն մեղաց դան ի վերա մեր, դարձուցցէ տէր Աստուած մեր, ամէն: Այլև ծանիցէ աստուածասիրութիւն ձեր վասն հարկեոր և լաւ ապրած առնդ, որ է դա ստոյգ դերո տէր և ունի դերի տարած, միջնորդօք և աղաչանաւք կատարած դորա, հիմա դա ոչինչ ճար չունելով, քան զՔրիստոս և զորին հաւատացեալսդ, շրջի լալագին աշաւք և դառն արտասուաւք ի դրունս ողորմածաց, խնդրել ողորմութիւն ի սիրելեացդ աստուծոյ:

Արդ արարէք դմա ողորմութիւն, որ շատ և որ սակաւ: Ով որ խաչի է խոստացեալ կամ Երուսաղէմայ ճանապարհին, կամ եկեղեցւոյ, տուք լիով ի ձեռն դորա, որ ազատեն այն քրիստոնէին անաւրինացն, զի ողորմութիւնն բարձր առ դատաստանն աստուծոյ...: Կատարողք աղաչանաց մերոց արհնիք յաստուծոյ և յամենայն սրբոց և ի մէնջ, ամէն:» (Վենետիկ, ձեռ. № 1092):